



Cussegliera guvernativa Barbara Janom Steiner è fitg cuntenta cun il resultat da la votaziun.

FOTOS Y. BÜRKLI

«Sustegn dal pievel per impurtantas refurmas»

In cler gea a la legislaziun executiva tar la refurma dal territori dal chantun Grischun

DA HANS HUONDER / ANR

■ **Cun gronda maiortad ha il suveran acceptà la legislaziun executiva tar la refurma dal territori. Cun ina lescha generala vegn concretisada la refurma ch’era gia vegnida concludida dal pievel grischun. Cussegliera guvernativa Barbara Janom Steiner è satisfatta dal resultat. Ils represchentants dal referendum èn – malgrà la terrada – medemamain cuntents.** Cun 33 537 gea encunter 20 021 na è la decisiun fitg clera. Fertion che la regiun da Cuira ed il Grischun central han ditg stediain gea a la legislaziun executiva tar la refurma dal territori han intginas regiuns periferas refusà quella. «Jau sun fitg cuntenta cun il resultat. El correspunda a quai ch’jau hai spetgà», di cussegliera guvernativa *Barbara Janom Steiner* che ha defendì la legislaziun sin plaun politic. Suent l’acceptanza da la nova gulivaziun da finanzas è quella refurma in ulteriur grond pass: «Quests dus projects rinforzan l’indipendenza da las vischnancas. Il pievel è stà pront da suandar la regenza ed il cussegl grond ed uschia da far impurtantas refurmas.» La refurma dal territori va en vigor l’entschatta 2016. In onn pli ditg han las corporaziuns regiunalas existentas temp da s’adattar. «Il temp per las midadas è sufficient. Il chantun è pront da porscher maun a las vischnancas e regiuns en connex cun questa gronda lavur», punctuescha *Barbara Janom Steiner*. Fitg cuntent cun il resultat è er il comité «Pro la refur-

ma territoriala». «La refurma territoriala porta blers avantags e rinforza las vischnancas», accentuescha *Bruno Claus*, co-president dal comité.

Procurà per discussiun

«Nossa finamira è stada quella da cuntanscher 40 pertschient da las vuschs. Quai è reussì», di *Gian Derungs*, co-president dal comité dal referendum. Sin fundament da quest referendum hajan ils adherents da la refurma territoriala gè l’incumbensa da prender posiziun. *Gian Derungs* constatescha ch’il comité ha chattà sensori surtut en las regiuns cun corporaziuns regiunalas pli grondas: «Quai è il cas en Surselva u er en l’Engiadin’Ota.» Malgrà la terrada è *Gian Derungs* da l’opiniun che lur campagna saja stada buna: «Nus avain empruvà da mobilisar las votantas ed ils votants en las regiuns pertutgadas il pli fitg da questa refurma. En il conturn da Cuira è quai stà pli difficil, damai che questas vischnancas n’èn betg involvidas en corporaziuns regiunalas sco autras regiuns.» Il referendum encunter la legislaziun executiva tar la refurma dal territori è vegnì lantschà da la pcd giuvna da la Surselva. Exponentas da pliras regiuns e partidas han allura sustegnì quel.

Ils binaris eran tschentads

Ils 23 da settember 2012 han las votantas ed ils votants grischuns acceptà cleramain ina revisiun parziala da la constituziun chantunala cun 31 788 (77 pertschient) cunter 9410 (23 pertschient)

vuschs per simplifitgar marcantamain il plaun d’amez en il chantun. Tras questa revisiun parziala èn vegnidas creadas 11 regiuns che substitueschan ils 39 circuls, las 14 corporaziuns regiunalas ed ils 11 districts. Tenor la basa da dretg constituziunal èsi stà necessari da far sco proxim pass la legislaziun executiva necessaria, senza la quala las 11 regiuns decididas da las votantas e dals votants na pon betg cumenzar a lavurar. Il cussegl grond ha tractà la legislaziun executiva en la sessiun d’avrigl 2014. Tenor quella vegnan las regiuns concepidas sco plaun d’amez simpel, concis e proxim a las burgaisas ed als burgais tranter las vischnancas ed il chantun. La regenza è persuadida che la furma organisatorica futura observa il princip da l’equivalenza fiscala, uschia ch’i vegn rinforzada l’influenza da las vischnancas, per las qualas las regiuns surpiglian las incumbensas. Il sforz dad oz da laschar ademplir incumbensas communalas da l’organisaziun regiunala vegn eliminà. Nua ch’igl è raschunaivel u necessari po il dretg chantunal prescriber da laschar ademplir ina incumbensa a las regiuns. Il cussegl grond aveva approvà la lescha generala davart la refurma dal territori cun 88 cunter 13 vuschs e cun sis abstenziuns. Ils ulteriurs elements da la legislaziun executiva tar la refurma dal territori sco revisiuns parzialas ed aboliziun resp. relasch da leschas, aveva il cussegl grond acceptà mintgamai senza cuntravusch. Encunter la lescha era reussì il referendum.



La pcd giuvna da la Surselva aveva lantschà il referendum encunter la legislaziun executiva tar la refurma dal territori. Da san. Curdin Tuor, Kevin Brunold, Gian Derungs e René Epp.